



荆溪外紀卷之九

邑人楚山沈



真州雲壁李文校正

長短句

贈金鷲山人沈師魯

盧仝 唐人

金鷲山中客來到揚州市買藥牀頭一破顏撇然便有上天意日月高掛玄關深金膏切碎肌骨異人皆食穀與五味獨食黍和陰陽氣浩浩流珠走百關綿綿若存有深致種玉不耕山外鑿非內粹儒關決文泉彰風雅因君不復墜光不外照刃不磨迴避人間惡富貴三日四日五六日

盤礴化元搜萬類，晝飲與酣陶。天和夜話造微絕，精魅示
我插血不死方。賞我風餐不肥臆，肉眼不識天上書。小儒
安敢窺奧秘，崑崙路隔西北天。三山復浮不着地，君到頭
上憶我時。金簡爲吾鐫一字。

還山吟送沈四山人

高適

還山吟天高日暮寒，山深送君還山識。君心人生老大須
恣意，看君解作一生事。山間偃仰無不至，石泉淙淙若風
雨。桂花松子常滿地，賣藥囊中應有錢。還山服藥又長年，
白雲勸盡杯中物。明月相隨何處眠，眠時憶問醒時意。夢
魂可以長周旋。

延陵季子

楊延秀 宋人

荆之溪兮澹以幽，惠之山兮雲伴思。君兮不見莽草木兮
偷偷面，句吳兮東而坐。背朱方兮北卧，齊楚豈不強而大。
兮吾王以安賢於國，其無禪兮不曰季子存。而吳賀彼情
者之衡言兮，謂垂亡於讓。王弗丕承於考心兮，用五湖之
與三江祀。大伯其忽諸兮，顧襲譽於子臧。曾不知民無讓
而不立兮，自古皆有亡。諷屺岵與耒箕兮，疇莫知其重輕。
若干乘與簞食兮，潔豐約而則明。迨躬逢而利快兮，亦幾
何而靡爭。謂吾札之不懿兮，札亦括受而茹。聲思復思兮，
君子乾坤毀而日月息。則君子之亦死。

漁父詞

趙孟頫 元人

儂住東湖震澤洲
煙波日日釣魚舟
山似翠酒如油
醉眠看山不自由

題荆南精舍圖

揚基

先生荆南客久住荆南地
荆南山水清且奇
綠玉芙蓉亂金翠
上有噓風嘯月之於菟
下有衝波激石之神魚
驚瀾怒濤不敢渡
青林欲上愁號呼
山人川嶽靈拂劍
睨九州蒼蛟授首白虎斃
丹崖碧水成安流
銅官聳西來歷歷青可數
騫如飛虬蟠飄如怒鯨舞
先生愛之不忍去
結屋溪南卧秋雨
溪南山色三千丈
正與茅堂屹相向
一箇青猿

霜外啼半規
明月松間上
先生居其中
日採澗底薇
讀書三十年
而無喜與悲
乾坤一變亂
飄泊不得歸
豈不懷故丘
夜夜夢見之
先生先生慎
勿憶爾之草堂
湖水百里遙
相望高山可梯水
可航何當騰買樽
中酒陽羨溪頭共晚涼

湖上吟

沈貞

悠悠湖中水不可窮
冥搜幽幽湖上山不能成
勝遊山水茫茫天盡頭
扶桑日濔紅玉毬把酒
臨風相勸酬高吟大唱
驚眠鷗紫霞流光拍天
浮豪鳴鼉鼉舞蛟虬
龍伯國人持釣鈎不肯浪
中投鳴夷子皮竊妻來不肯下扁舟
大笑

立湖邊欲知此意不半岸烏紗巾斜披紫雲裘秋風吹骨
寒颼颼麾斥八極隘九州傲睨物表瞪雙眸狂呼李太白
捉月遡浪流喚取岑夫子復召元丹丘元氣未洩如覆甌
神仙有無不可求此即是蓬萊此即是瀛洲何須白玉京
五城十二樓胸中長虹爛不收胡爲自繫如楚囚莫學仲
尼栖栖魯莫作孟子區區鄒長笛一聲孤鶴橫秋與爾爭
洗萬斛之間愁山幽幽水悠悠

湖上懷古

山蒼蒼水茫茫大雷小雷湖中央扁舟范蠡竊妻去遙望
姑蘇空斷腸一朝西兵遠來越胥門孤臣兩睛血卧薪嘗
膽荷冤人杖擊當知冤可雪五湖水五湖山五湖山水常
人間吳越興亡總塵土西施范蠡傳千古

題姚節婦

倪瓚

節婦復節婦處心良獨苦苟不義而生孰若義而死荆南
流水石齒齒冠辱形虧澆清泚妾身可死不可辱夫從父
生死携女婦兮婦兮死所安使我感激涕洟瀾古今出處
多射利委身事國爲貪奸瀛王易主意未殫身沒令名生
美官嗚呼史臣直筆古來少孤臣直節今尤艱

前題

遂初 補子

死有泰山重有輕如鴻毛吾觀金氏傳死節何其高吁哉

節婦繫風化處心如此獨賢勞三綱五常大居正汝脩史
臣良可褒用之邦國歌以謠

張公洞

馬治 國朝

嬾騎白鹿去不駕青龍車張公煉丹行九地路繞五嶽皆
空虛洞口當天門仰空亟崎嶇履蓋山下秋聲早聞步松
風拾瑤草仙家知我携客來靈官夜掃煉香臺玉女迎人
酒一杯笑予不飲胡爲哉石田熒熒太始雲丹竈温温萬
劫灰我欲照海底西觀小有天千迴萬轉翻疑慮有若止
我不得前不逢青驪翁長吟古苔篇錦屏璇室無塵影珠
宮玉堂仍自然何用鐵鎖高高懸洞中蕭蕭與天連與天

連相逶迤呼吸通神明來往安可期

游龍巖三洞之間贈東臯生

三十六洞何紛紛倦遊試拂龍巖雲龍巖之山昔所聞白
波中浮洞庭君混沌初離元氣分雷疾如崩電如焚從昔
金仙棲上方五丁斧鑿三石房供以百斛青霞漿惟留一
餘訝玉室映金堂銅官差我空復云乃有銅棺藏張公煉
丹處人去紫苔荒靈官玉女虛名耳青驪不歸已渺茫如
何龍巖三石房內猶肺腑閱腎腸間有尋丈魚見人化去
不可量水邊荏苒露牙角一日四海流滂滂我呼東臯生
下觀潛龍宅搏桑小燧飛入來照見乾坤與人隔世間日

月輕變遷我欲待子無爲先後天而終道自然石上一愁
三十年

姚節婦

失身重可笑得死重可悲借問死爲誰金姓姚臨妻出門
語夫城不守我死辟兵汝從舅舅在夫生父子全一門貞
孝事皆天吁嗟節婦誰不死之死千秋有流水水可竭山
可崩吁嗟節婦兮燁燁我義興

遊龍巖三洞之間

周砥

問顏紫芝久不採淮南丹書竟安在仙人勸我三洞遊身
如騎龍到東海海氣茫茫雲霧迴白波捲雪連山來雙童

手弄海底日紅光一道金蓮開瑤草綠可折瓊樹花冥冥
昔人煉丹丹竈在錦苔繡石光清熒雷行半空中逢逢擊
天鼓玉女鸞笙時下來前頭四足神魚舞醉拂珊瑚鞭玉
虎我欲因之窮洞府聞訪八公五雲裡爲說蒼生受辛苦
不然飛出西華顛太極總仙之洞天安得周迴更二千直
與龍巖之洞相鈞連蓮花峯上重携手笑攬霞觴窺八埏

張公洞

儵忽鑿混沌茲事豈其餘不知幾何年云古仙人居嗟我
至此爲之躊躇洞天諸宮窅兮黑試命烈火燭空虛森森
恠石相對立如口欲語手欲拈前有紫翠房白雲閱丹書

鷹揚燕舞化爲石芝田久矣不復鉏可憐仙人常恍惚雖
欲相從已超越崑崙閬風吁太高時亦幽潛到巖窟青泥
爛爛浮土潤綠髓涓涓映山骨吾聞仙人不食而長生何
得有此鹽米之空名豈伊往來真戲耳簸弄物化令人驚
頗疑壺公壺樓閣中崢嶸摩尼珠色帝青色千竒百恠誰
所營須臾眼暗燭欲盡惟以拄杖相敲鏗松中濛濛呼我
出耳中微吟白玉笙竦身欲上不可登縵引魚貫相支撐
歸來此景若夢寐俛仰宇宙惟清明

荆溪送別

王晏

山雲白雲山青鴈聲正在溪邊聽衣冠送客歲云暮匆匆
欲行船尚停船停引杯緩歌長傷柳短旆短晴雪泊將攀
思猶懶酒酣舞劍春意回春風先動南枝梅京華到日倘
相憶遺我雙魚尺素來

題姚節婦

李信圭

黃塵滿城風瑟瑟白日無輝晝昏黑媿人抱女呱呱啼可
柰寇兵疾追迫妾身皎如練肯忍他人欺妾心堅如鐵寧
死終不移夫君淚揮別最苦捐生奮躍江之許天地難回
命一絲煙波長鎖愁千古亂離豺虎群相呼紅顏多少委
泥塗媿人令節真良圖嗚呼忠臣烈女何代無嗚呼忠臣
烈女何代無

前題

程克讓

節婦世或有貞夫良獨難太湖之上荆南山中有世家姚
氏節婦居其間近時群寇逼城下長衢蹀躞多戎馬挈家
已復出荆南逐逐東行向原野前惟舅在途後携女與夫
賊勢窘迫將安趨身亦不可辱行亦不可虧遂致溺死臨
清渠婦抱女死夫與父還婦死夫活心始安婦死夫活節
始全願夫養親甘旨完願夫保身金石堅願夫千載奉祠
事子孫不絕長綿綿五湖之水清而旨繚以青山百餘里
水遠山長有盡時古來節婦名不已嗚呼五代季年衰且
窮馮道自稱長樂公我今見此顏爲紅哀今之人將無同

國山城

劉震

隱隱蒙巖山葱瓏百尺蒼雲間白鶴青鸞相往還涓涓蒙
巖泉一泓漱石清泠然流作澄潭光浸天山可杖屨泉濯
纓此中方丈即蓬瀛世情過眼只長嘯朝是暮非焉足評
君不見國山城晉興隋廢真夢幻萋萋芳草春煙生

九斗壇

謝鏗

九峯山下龍所鍾九峯山上雲濛濛神光夜照清淨宮夢
魂直過仙壇東張水曹何桀黠同泰奴心怛怛隨車甘雨
山上來不救臺城夜深渴

贈荆溪沈行慎

李應禎

吁嗟乎中谷抱吾書以歸來兮于焉以讀谷之陽兮雲之
麓峯盤盤兮石如玉我居孔幽兮翳彼嘉木遐思故人兮
言緬其積載詠載歌以悅我心白雲在天清風滿林世昧
昧以去古兮禮樂散而莫尋探禹穴之杳杳兮望龍門之
高深林有鳥兮溪有魚爾飛爾潛兮我讀我書以卷以舒
樂哉弗諼兮山中之居

題吳友雲忠節

王鏊

真人起胡運隳滇南由蘖鴟張何爲武臣請師歿弗遺
皇仁如天兼愛之曰汝雲蘖且平汝能與朕爲陸生一使
功賢十萬兵蘖胡獮圖反噬劫我使臣改椎結使臣指心
向天誓首可斷服不可異中郎旌侍中血前有忠文後忠
節滇南萬里雙象設千秋萬古廟食不絕

送吳忠節孫鳳翔還宜興

杭淮

君爲吾鄉忠節之子孫醞藉風流殊不群憶從尚書死滇
寇流落湖襄如綫存春來秋去復誰在衣窶食缺貧到身
太僕節義本天性李應辛苦持牒搜諸民吾師同聲有楚
相王文徧告官司給舟緡百年一日見故里田廬何有但
空村故老相持欲泣下幸今不作他鄉魂古來忠節亦云
罕一代吁嗟無數人巍然廟貌食滇土却與待制齊榮尊
王侍制禕
亦死滇寇

天子思功錄其後豈必君身終賤貧君行且作買山計守
義俟命期振芬尚書墳拋應山縣春風寂寞吹荆榛君能
數鼓蕭湘舵岸藻汀蘭歲歲新

送吳老歸宜興

羅玘

遺金在道吾亦攫入朝爭名戰自惡胡爲徒手長安歸骨
瘦脰長如野鶴君不見饑鳴低飛啄腐鼠飽鳴人屋人射
女又不見鶴飛入層雲赤睛只只窺天文腹則饑眼獨飽
下栖舊林覺林小征西廟前是舊林鳳凰巢高喧百禽

遊張公洞

何棟

崑崙空同天之西高高不極與天齊時隨金母廣成子周

覽紫虛窮攀躋翻身復作洞天遊凌風飛墮陽羨溪溪邊
靈嶠七十二群仙欲借窟宅栖疾驅五雷鞭雙龍擘裂巖
洞開青猊玄臺秘宇分明見虛玄曠邈乾坤迷盤盤倒下
三千尺曲屈嵒磴接金梯大千寶藏開地底山靈呼號谷
神啼金莖直上玉筍倒垂琅玕鐘乳的皪拄支空青丹砂
熒爛歲蕤雪光錯落錦文亂黛色霏微蓮花披長風吹散
天帝朝寶幢羽蓋相追隨曉日照耀海若宮珊瑚水晶自
參差心駭目眩形神竦紅霧碧霞不可窺丹竈星星尚伏
火石田歷歷皆種芝金膏不流玉屑可炊龍性難羈鶴骨
本羸翻飛自便遨遊頗宜彷彿入紫清依稀登玉京雙童

神異書
神異書卷之九
綽約導前路忽遇玄元老子爲我說長生靈文玉籙五千
字先天無爲道自成

遊張公洞吟

顧可久

少時聞道經已慕洞天之神靈欲窮冥筮豈辭遠况乃荆
溪春水生溪月照我舸飄飄倏已墮綠蘿直下不知幾千
尺浩蕩杳冥無不可初疑雷霆突地出霹靂撼擊勢燎懷
復似長風駕海來波濤洶湧聲喧逐摧巒蹶石籟發秘開
琅琊森戟歷下底金莖抵掌撐空頽青瑩珉玉交錯落阻
折梯磴互盤迴徑具石滑不可躋入幽深兮路轉巖壑括
日月吐納雲霓層巖倒墮臺壁峭齊奇形怪狀不能辯窺

鬼物撇捩熊羆呻悲上帝弭節而危坐玉女載旗而逶迤
陰宮丹竈火不滅籀文履迹留其遺吁嗟乎何物谷神發
此幽冥使我魄悸而魂驚憶昔居瑤京夢見玉女遺我金
蓮之紫莖玉爪搔背悚然骨輕云我謫世是伊後身金丹
玉液默授以經乃今所歷前言頗成吾將棄軒冕飲沆瀣
從此始兮遨遊太清

荆溪外紀卷之九

荆溪外紀卷之十

邑人楚山沈牧編輯

真州雲壁李文校正

歌

茶歌

盧仝 唐人

日高丈五睡正濃將軍扣門驚周公口傳諫議送書信白
 絹斜封三道印開緘窈見諫議面首闌月團三百片聞道
 新年入山裏蟻虫驚動春風起天子須嘗陽羨茶百草不
 敢先開花仁風暗結珠蔕蕾先春抽出黃金芽摘鮮焙芳
 旋封罌至精至好且不奢至尊之餘合王公何事便到山

人家柴門反關無俗客紗帽龍頭自煎喫碧雲引風吹不
斷白花浮光凝碗面一碗喉吻潤二碗破孤悶三碗搜枯
腸惟有文字五千卷四碗發輕汗平生不平事盡向毛孔
散五碗肌骨清六碗通仙靈七碗喫不得也唯覺兩腋習
習清風生蓬萊山在何處玉川子乘此清風欲歸去山上
群仙司下土地位清高隔風雨安知百萬億蒼生顛
崖受辛苦便從諫議問蒼生到頭合得蘇息否

茶山貢焙歌

李郢

使君愛客情無已客在金臺價無比春風三月貢茶時盡
逐紅旌到山裡焙中清曉朱門開篋箱漸見新茶來凌煙

觸露不停採官家赤印連帖催朝飢暮餽誰與哀喧闐競
納不盈掬一時一餉還成堆蒸之馥之香勝梅研膏架動
轟如雷茶成拜表貢天子萬人爭噉春山摧駟騎鞭聲若
流雷半夜驅夫誰復見十日王程路四千到時須及清明
宴吾君可謂納諫君諫官不諫何由聞九重城裡雖玉食
天涯吏役長紛紛使君憂民慘容色就焙嘗茶坐諸客幾
回到口重咨嗟嫩綠鮮芳出何力山中有酒亦有歌樂營
房戶皆仙娥仙房十隊酒百斛金絲宴饌隨經過使君是
日憂思多客亦無言徵綺羅殷勤繞焙復長嘆官府例成
竟如何吳民吳民莫憔悴使民作相期蘓爾

陽羨春歌

陳克 宋人

石亭梅花落如積土，
鰕爛斑竹姑赤，
祝陵有酒清若空，
煮粳蒸魚作寒食。
長橋新晴好天氣，
兩市兒郎擢船戲，
溪頭鼗鼓狂殺儂。
青蓋紅裙偶相值，
風光何處最可憐。
邵家高樓日邊樓，
下遊人顏色喜溪南。
黃帽應羞死三月，
未有二月殘靈龜。
可信滄水乾，
封草青青促歸去。
短簫橫笛說明年。

遊太湖歌

楊維禎 元人

鷓夷湖上水仙舟，
舟中仙人十二樓。
桃花春水如天浮，
七十二黛吹落點點疑。
鸚鵡道人謫世三千秋，
手把一枝青

玉蚪東搏海日紅，
桑膠海風吹住吳王洲。
吳王洲前校水戰，
水犀十萬如浮漚。
水聲一夜入臺沼，
麋鹿已無臺上遊。
歌吳歎舞吳鉤，
招鷓夷兮狎陽侯。
樓船不須到蓬丘，
西施鄭旦坐兩頭。
道人舟中吹鐵笛，
仰看青天倒流商老人。
橘幾奕東方生，
桃幾偷精衛。
塞海成甌窶，
海蕩邛山漂。
髑骸胡為不飲生，
春愁

采茶歌

卓元聖

山之顛，水之涯，
產靈草，年年采摘當春早。
製成雀舌龍鳳團，
題封進入幽燕道。
黃旗閃閃方物來，
薦新趣上天顏開。
海濱亦有間世才，
弓旌不來無與媒。
長年抱道栖蒿萊，
撚

髭吟盡江邊梅嗟哉人與草木異安得知賢若知味

湖山佳趣歌

李禎 國朝

半生甘作隱者流兩屐不到侯門遊老去高情付林壑閑
來樂事只漁舟春水泛花漾孤嶼杜衡薜蘿滿脩渚晴樹
遠連江上村晚雲忽作溪南雨自憐身世兩悠悠濯纓濯
足忘吾憂萬鍾懸爵本非志一竿在手何所求門前學種
五株柳逸興雅懷到處有對客石牀撫古琴留客山瓢斟
濁酒年年歲歲適閑情皞皞熙熙度此生已無天上鴟鸞
夢且結湖邊鷗鳥情

萬松樓歌爲沈懋常題

卞榮

南遊陽羨里訪我沈夫子夫子好門墻高樓面山起山中
種松一萬株萬松名樓揭大書吾聞古有萬松閣若比此
樓良不如松風徐徐來翠濤滿樓響分明太湖三萬頃置
我樓中几席上松月皎皎出蒼煙淨無迹誰遺驪龍頷下
珠照我玉容如雪白初融空自鞭火龍烈焰不落清陰中
殷其雷在南山下螭龍何曾戰于野空花皆幻爾髯叟獨
蒼然與樓結好三千年星辰拂動蚪枝摘白雲招入鶴帳
眠長材直榦作棟梁夫子勅賜尚書郎會封十八公吉
夢尋常勸君多釀松花酒我欲登樓再獻崑崙觴笑拍
闌干醉一場

雲山圖歌為萬司理題

張弼

子居巷西我巷東朝田公退時過從忍持一畫索我寫云
是東臯之耕者東臯耕者我所聞高卧荆溪看白雲卧雲
看山山亦飽遠近高低隨手掃淋漓元氣真宰俱何曾苦
學高尚書松壑蘭汀遠茹舍群鷗時來鹿時下小舟入郭
買茶回只問近時柴米價却招張公洞裏老主人元是殮
霞服日之群真多種瑤草為養鶴大家淨洗世俗之紅塵

張公洞歌

王鏊

萬山環合中獨虛世傳中有神仙墟側身俯視驚恠吁老
眼不辨雲模糊巉巖漸下勢漸舒石壇坡陀席可鋪恍如

身入佛老廬四壁洶湧青紅殊天吳紫鳳坼海圖龜鼉眇
睽虎豹狙杳恩梁柱相拄扶靈官岌業高冠裾神媪相將
行步徐七寶眩耀穹浮屠石牀橫陳丹竈孤玄門有路忽
又無薜磴陟降我僕痛通明有穴尋歸途不知造化開闢
初誰此鐫刻誰剜剝頗聞孫氏紀赤烏霹靂下劈山之隅
人世始得窺仙都又聞有路通太湖金庭玉柱辯禹貢自
慙骨凡氣濁痛欲往不得將何如欲往不得將何如

善權洞歌

湖汊有洞名張公天造偉麗非人功善權氣勢更若雄奔
流下瞰如驚虹洞門有地平且豐孤石湧起何龍蔥高崖

絕壁青復紅恍如身入天帝宮
幡幢寶蓋陳西東虺積巨
象披蒙茸狡狴張吻吞豹熊
亭亭玉柱立當中銀山對峙
如屏風鹽堆突兀米廩崇仙
田粼粼水所鍾石梁交貫空
復空人言此去路莫窮東至
搏桑西崆峒我疑二洞俱仙
踪地下有路應潛通前堂後
宇相始終不然氣象胡乃同
靈山福地神所封嗟我欲往
將焉從嗟我欲往將焉從

擒虎歌

吳仕

嘉靖丙戌春侍御朱公按部義興澤生蘇枯患
北既浹刻蠹搜奸閭里為靖維茲虎患猶未殄
息膏流血潰寔用與哀乃下令國中召獵徒懸
賞格戒時日期截厥類乃已於是山鬼效靈武
夫用命未旬殪玄豹一白額虎二相繼以獻
歡聲載道膏澤若流乃作是歌爰紀其實

銅宮之陰離墨陽長林渺渺烟蒼蒼有虎負嵎莫敢當
白日攫人如驅羊女哭兒嚎聲四塞不聞村南與村北月黑
惟聞俵鬼啼山頭不見行人跡帝為震怒走律令下召使
者司天刑授之鈇鉞副弓矢從以雷電神六丁維時帝命
不容宿驅車直指荆南麓山搖嶽震百靈悚雷厲風飛令
行速大召獵徒懸賞格期以三日虎必獲格外仍開贖罪
科有能得虎勿爾碎人思效力爭向前踪跡虎所披雲煙
戈戟如堵網四懸有神若驅鬼為鞭倏忽爛斑出林薄長
戈短刃紛揮霍文章破碎膏血零聲威震蕩神光落昇向
端前致詞匪使君靈曷有之使君仰天答天祐維此天

功吾敢私立召獵徒相慰勸白粲金錢賞如願壯夫作氣
聲滿山一豹二虎相繼獻三害已驅六政脩使君恩澤沛
若流行將奏最 金門下應陟崇階撫十州

石亭歌

青天作障雲作屏超然中結水心亭金尊細滷篋管綠湘
簾半捲芙蓉青長松亭亭十萬樹石骨纍纍太瘦生九霄
使者三楚英西來聲價何崢嶸黃鵠山中駕鶴仙青虬海
上釣鰲客五湖煙月在揮毫寧羨區區九州伯一朝令下
神鬼驚長蛇封豕潛無跡風清日永政多暇獨往山中訪
遺逸石亭西隔畫溪雲有客悠然會此心手挾銀潢飛百

天卧對香爐碧萬尋興來獨撫綠綺琴天風颯颯吹冠衿
林天長嘯復三嘆高山流水幾知音酒酣拔劍起欲舞千
山紅間萬山紫意氣逢君豈偶然宛奏簫韶諧角徵沿流
箭首拾飛觴月在珠宮天在水一聲殘磬萬籟凝四顧蒼
茫悄無語支頤覓勺良亦苦不妨撚斷幾莖髭青驄入鞞
八語亂野燒無光林葉稀枕流嗽石真吾事浴日補天唯
爾爲雲山一會何由再從此相思減帶圍

滄溪歌

馬玄

薔薇開鷓鴣來燕嚙泥蒲葉齊蘭橈桂槳入迴溪溪上吳
姬白浣沙溪邊仙犬吠流霞雲深路杳知何處中有江南

季子家碧嵐漠漠銅官樹紅浪重重二九華彭澤新栽局
士柳青門學種故侯瓜已無空衙散鳴鳥只有歸舟隨乳
鴉季子來絃歌歇武城夜夜空明月釣絲獨抱滄溪頭日
袍皂帽思悠悠竹間初起辛夷館煙裡常眠杜若洲乘月
拔船上天去隨風採蔣入雲流入雲流上天去隨處滄溪
隨處佳青蘋歌芳白芷生采蓮渡頭春已暮筆牀茶竈極
天涯渠今盡識江南路江南路麗以妍鴛鴦何翩翩平蕪
渺千里日暖金沙鮮竹竿裊裊自年年何似播珮承明前
君不見東坡先生曾買田

荆溪外紀卷之十

荆溪外紀卷之十一

邑人楚山沈敷編輯

真州雲壁李文校正

行

殺虎行

并序

劉宰

宋人

戊子巳丑間毘陵境內多虎患未有制之者宜
典趙大夫至未幾即空其患而旁邑之官亦以
是息漫塘劉宰聞而壯之爲
賦殺虎行以遺觀民風者

君不見宜興周將軍射殺南山白額虎千古萬古聲傳聞
又不見宜興趙大夫南山二十有六虎全行殺取無復餘
一虎昔何少二十六虎今何多虎多不爲患所患政之苛

苛政滅人門猛虎戕人命擇禍莫若輕泰山之人論已定
大夫性高明下令走風雨所知在田里了不見臺府既令
民免政之虎又與民除虎之苦四境之民歌且舞或云殺
虎太傷和何不令渠自渡河我聞此語笑且呵大夫憂民
憂豈必限吾土不然隣國以爲壑信也白圭愈於禹古陽
羨今宜興大夫邑之主將軍邑之民主賓多寡事不同千
古萬古同清芬

父老行送鄒縣丞

王晏 國朝

春風輕春雨晴孝侯祠前溪水生桃花初紅柳初綠父老
慇懃來送行殷勤杖扶策父老言感激官長多賢明三載

今考績官長前年始下車教化吾民苛政除門靜鄉無叫
囂吏婦女育蠶男讀書官長今年朝闕去田辟荒蕪戶增
數利澤於人惠有餘往者紛紛奚足慕 玉殿承恩拜舞
回織成鸞誥錦文開京華得意看春色還作吾邦父母來
父老於時出郊野接官兒童騎竹馬

過客行贈陳卿兼簡張元寶

楚江懸帆幾千里路出周侯斬蛟渚停舟冒暑入荒城汲
汲何人越鄉語自言新下岳陽來袖有髯張書寄回以我
交情頗誠朴叮嚀親授柳菴開柳菴衡門市南陌喜識陳
卿乃佳客煮茶延坐致慇懃更爲髯張問踪跡忽忽即別

不肯留出門重約當清秋經過却取平安字將去巴陵慰
客愁

荆溪外紀卷之十一

荆溪外紀卷之十二

邑人楚山沈敷

真州雲壁李文校

詞

菩薩蠻

蘇軾 宋人

買田陽羨吾將老從初只為溪山好來往一虎舟聊從造
物遊 有書仍懶著且謾歌歸去筋力不辭詩要須風
雨時

滿庭芳 并序

余居黃五年將赴臨汝作滿庭芳一篇別黃州
既至南都蒙恩放歸陽羨復作一篇

歸去來兮清溪無底上有千仞差峩畫樓東畔天遠夕陽
多老去君恩未報空回首彈鋏悲歌船頭轉長風萬里歸
馬駐平坡無何何處是銀潢盡處天女停梭問何事
人間久戲風波顧謂同來穉子應爛汝腰下長柯青衫破
群仙笑我千縷掛烟篆

鳳棲梧

荆溪
寫景

山秀芙蓉溪明菴盡真遊洞穴滄波下臨風慨想斬蛟人
長橋千載猶橫跨解珮投簪求田問舍黃雞白酒漁
樵社元龍非復少時豪耳根洗盡功名話

鷓鴣天

陽羨
競渡

陳克

柳外東風不滿旗青裙白面出踈籬
曉來打鼓儂吹笛催送兒郎踏浪飛
傾兩耳關雙螭家家春酒瀉尖泥儂
今已是滄浪客莫向尊前唱教池

浣溪沙

陽羨
上元

橋北橋南新雨晴柳邊花底暮雲輕
萬家燈火照溪明鳧鳥差池官事了
木山彩錯市人驚街頭酒賤唱歌聲

又

菴盡溪頭春水生銅官山外夕陽明
暖風無力小舟橫萬事悠悠生處熟
三杯兀兀醉時醒杏花楊柳更多情

好事近

石亭
探梅

尋遍石亭春點點暮山明滅竹外小溪深碧倚一枝寒月
淡雲疎雨苦無情得折便須折醉帽風鬟歸去有餘
香愁絕

千秋歲

壽吳大常

儲懌 國朝

老來供奉仙籍張公洞巾屨處溪山供流年看薦茗嘉節
添傳樓和竹醉此君歲與生朝共 正洗金尊送江鶴
聞清弄更起舞雉為仲素封非吏隱白髮無秋 種種壽罷
玉堂又獻長生頌

又

傅珪

蒲觴清晝又是懸弧候珠履集笙歌奏 皇恩 日漸新味

菜恒如舊行樂處荆溪一棹春煙皺 梧竹森森茂庭

階翻彩袖醺旨酒介眉壽纔登七袞初直到千年後蓬島

上大郎夜夜瞻庚宿

水龍吟

溪行有感

吳儼

乾坤浩蕩無涯幾人獨立風塵表湟中得喪槐南富貴夢
魂空繞紅蓼灘頭黃蘆岸側漁煙斜裊問釣鰲公子舊磯
存否此去路應多少 記得扁舟來處見銅官一峯青
小洗頭玉女種芝丹客何時是了翠竹蒼梧清泉白石分
明蓬島又詩人才子賡歌疊和自堪怡老

臨江仙

憶予

我愛予莊風景好白沙翠竹柴門而今身落在塵樊冠裳
纏縛此意有誰言 翠壁丹崖千萬丈山靈未許扳援
何時投綬更高騫長松樹底石上聽啼猿

永遇樂

謝丁侯咸
祝功成

吳仕

心事水清才華錦美縣庭如水百里民瘼一緘封事宛轉
聞官裏九重

神聖維新治理飛下金雞一紙謂江南十州均賦豈應低
昂彼此 一日功成五湖恩被竹帛安能盡紀銅嶺我
我畫溪瀰瀰應與相流峙考求圖記二素輝映今得公為
三矣試看取萬戶歌聲千秋廟祀

漁家傲

送李晉卿
令宜興

夏言

二十九年如一夢鹿鳴筵上笙歌動今日長安尊酒共遙
相送行春好醉張公洞 但得閭閻無疾痛莫辭枳棘
棲鸞鳳自古循良非小用須珍重他時為撰甘棠頌

風流子

詠玉陽洞天寄玉
陽山人史恭甫

陽羨溪山好吾將老曾見昔賢心念此語空留買田未遂
桃源一別舊路難尋歎人生幾回王子棹都付伯牙琴那
似山人煙霞占斷洞天深隱高卧長吟 向僊臺佛窟
看紫煙歛散白日升沉時聽湍流激玉巖溜淙金更健步
堪遊底須策杖直鉤可釣不用敲針何日扁舟滴水獨訪

雲林

念奴嬌

詠玉女潭用東坡金陵詞韻

玉光閣上憑闌處下有蜿蜒神物窈窕洞天煙霧裏環鎖
千巖萬壁鳥埭雲間龍淵石峭虬峽濤翻雪山翁占斷江
左地靈人傑凌虛臺上倚青冥碧樹滄洲遠興時時
發極目斜陽飛鳥外杳靄斷霞明滅縹緲亭邊回陽洞口
長嘯披玄髮玉梁倒影古潭冷浸秋月

荆溪外紀卷之十二

荆溪外紀卷之十三

邑人楚山沈敫編輯

真州雲壁李文校正

賦

長溪賦

謝靈運

六朝宋人

潭結綠而澄清瀨揚白而戴華飛急聲之琴汨散輕文之
漣羅始鏡底以如玉終積岸而成沙

震澤賦

朱伯賢

元人

客有鄒陽生號遠遊公子傲儻玫瑰超竒拔偉衣白雲之
翩翩我危冠之鞞鞞神恍恍以欲逸風飄飄而疑佇於是

上會稽探禹穴訪遺踪超洞壑輶車前驅輜重紛錯王子
進之以笙鶴江令贈之以勺藥邈乃揚颿錢塘鼓柁中吳
將欲窮覽山川壯遊江湖造松陵主人而矐然從予主人
曰子號歷覽亦嘗聞澤藪之大有三萬六千頃者乎生曰
未也可得而聞與主人曰唯唯夏后震澤周日具區下屬
三江寔爲五湖右接天目宣嶺出溪之原左通松婁中江
入海之如衆流之委群利之儲若溪出其南深水經其西
五灣豬其東垂虹界其隄流甘泉之清液隱雪灘於北隈
洞庭中起林屋天開渺彭蠡吞雲夢駕雷夏軼孟豬杳不
知其幾千里之爲遠疇能計之三萬頃而有餘其澤則汪

漾

音滿

汗沟湧滌潏漫泮泮渙渙云云流颿吹波結

絡龍鱗日光玉潔澄沆氣溫清瀾凝綺花成文浪濤噴

濟澎湃

音出雷騰虹蒸雨生雲呼吸陰陽吞吐乾坤

如潮汐之不測或早莫

音而具觀飛揚蕩薄迅復

淪千態萬狀不可殫論其藪則碧沙曼衍黃石武夫莎薛

薰葭白煩

音青蒲苕苕蘊藻荻菰蘆蔓菁杜若

犀蕪芡實鷄頭草長龍須

音芡荷翠沃蓮藕芡粳

居之何可勝圖其土埤則塗泥微露埤濕就乾歲薪蘆蒿

菹芷蘅蘭菖蒲馬荔荃蓀射干汚楊絮白水柳葉丹蘋蓼

早綠榆楓莫殷朱橘火齊黃甘金九連枝並秀駢集乎其

間爾乃周流梗槩溥覽闡斑兩兩相峙鬱乎崇山其山則
層巒崑崙崙嶺嶙峋岑欹參差如陵如嶺崔嵬猶萃陂陁
糾紛上拔仞岡下臨涓澗控地軸以磅礴逐水曲而折旋
馬跡屹立以巖巖翠峯峻拔以盤桓戛浮雲之流景俯蛟
龍之深淵空谷谿斜以無底磴道宛蜒而相連其中乃有
奉真之祠供佛之堂琳宮道館梵宇禪房煙雲縹繞金碧
焜煌黃冠緇衣往來而尚羊談玄讚空學幻言唯或高堂
以演玄或擊鮮而稱觴駕白魚之飛艇泝重湫之流光水
崖則粘螻旋螺土蛤石花鮪鱧鯽鯪鯢鱖鯪鯪鯪鯪鯪鯪
鱖之魴細鱗之鱖紫甲之蝦稱蠚盈尺巨鼉專車長蛟

潛鱷同窅龜靈鼉周游涵泳其樂無涯羽禽則晨鵠莊鷄
鵲鶴鳧鷖交無鵠音保鵠鷓鴣鷓鴣群鴻來賓陽鳥攸居鴛
鴦遠舉鷗鷺忘機王睢並鶩屬玉交飛振翮刷羽以教音
以嬉來如雲集去如烟晞若乃絕岸之濱漸水之石或伏
或倚或卧或立或方如珪或圓如璧或矗如峯巒或平若
几席或滑若砭肪或廉若劍戟或頽而赤或蒼而碧或縞
如玉或黝如漆為中流之砥柱若逆河之碣石恠恠竒竒
熒熒爍爍斯又天造之神工而出於茲水之蕩激也思昔
夫差競霸圖勳麇戰於此勝負未分旌旗蔽空舳舻如雲
始魚鱉以為樂終麋鹿而成群迺若歸釣之徒著書之士

去國鳴夷泛舟西子亦復渺渺滄波茫茫白水主人之辭
未終鄒陽生蕭乎改容喟然而嘆曰甚矣世道逾下而人
心之不古也吾子好學頗識典策不述職方之經邦而盛
稱茲澤之庶殖不思禹蹟之胼胝而徒嘆英賢於戰國皆
非所以極遊覽之願望而擴夫五性之至德也遐思往古
擊節太息請誦主人所聞而陳予所得嗚呼噫嘻浩蕩之
方割懷襄未平九域混而莫辨百潦壅而不行支祁崛強
於淮甸天吳披褐於海溟時維茲水震蕩靡寧浮浮洶洶
砉砉轟轟疑撼天而動地猶駕雷而鞭霆類不周觸而天
柱折若巨鼇扑而洲島傾斯震之澤所以錫名也迨夫九

載既南庶土交正波神受職川后奉令應龍畫地以效功
庚辰持戟而制命導吳淞以安派別淮海而表境于時澤
安其所水順其性鳴者自停動者自靜斯震之澤所以底
定也千載而下美哉禹功昏墊之害既遠灌輸之利無窮
故漁人舟子之出入豪商薄宦之經從擊楫鼓浪引帆隨
風莫不連檣接舳往來乎其中斯又具區之數以萬民惟
正之供也方今海宇清明朝廷靜謐內宣民化外脩貢職
農安其耕女效其織工業其習商估其直士守遺經民食
餘力風不揚波水不濫決方鎮以寧土地墾辟闢開禹之
疆廣禹之績是以九州之外咸仰聖育沾濡于仁義涵泳

乎道德浹洽恩波沐浴膏澤漸磨浸潤流行洋溢天無亢
燥之灾人樂沃土之俗試言其故則辟雍湯湯音傷聖化行
矣靈沼洋洋聖澤汪矣御溝溶溶生意茫矣溥德川流達
要荒矣下視一隅寧不溢杯水於坳堂矣主人於是聳乎
樂聞憮然自失仰神功之長存慨餘子其何益相與鼓枻
乎滄浪曾不帶芥于胸臆迺起爲詩歌以頌德詩曰於赫
禹功配天比隆生我遺氓宅我土中原隰昫昫江漢爲東
萬世永賴惟禹功是崇於皇禹德立我民極手胼足胝救
焚拯溺鑿井而飲耕田而食靡謝天功焉知帝力於昭太
上示民以應眷佑我皇與民立命開禹疆土繼禹作聖其
混合四大惟民之正於穆聖皇上帝不常敬哉有土暨暨
弗敢康五嶽四瀆七澤九岡罔不脩其職來享來王於天
之祐於萬斯年瞻我有土有民有子有孫有引勿替
以頌茲文

荆溪賦

李東陽 國朝

宜興荆溪之勝予聞諸徐文靖公舊矣吳禮部克溫世居
其上爲予道之尤詳請賦焉乃作賦曰有溪來自東南兮
勢奔騰而蜿蜒界甸服以爲中江兮稱義興之名川上源
出於蕪湖兮下通流於震澤乃雲雨之是興兮亦蛟龍之
攸宅歷松江以入海兮渺不知其所極棹蘭舟而遐鶩兮

與群山而逶迤畫屏爛其前陳兮錦帳紛其後隨樓閣倒
景於空青兮沙石分明而陸離彼魚與鳥其何心兮亦水
沫而雲飛惟夫君之好脩兮稟坤輿之清淑鍾世澤於名
門兮廕嘉林於喬木泓一鑑以爲池兮結重茅以爲屋朝
擊秀於山巔兮暮攀芳乎水曲抱經濟以用世兮出觀光
於兩都躡瀛海之高蹤兮覽長江之壯圖歎墨突之不得
黔兮念陶園之將蕪列魁象於三台兮寄高情於五湖予
養癖於林泉兮每探竒而索奧考茲地於山經兮恨不高
飛而遠到重文靖之盟言兮亦惟斯人之爲好慕楚頌之
遺風兮矧蜀山之惟肖孰使溪之名荆兮復洞庭之是號

豈不懷乎三湘兮芥風濤之浩浩楚人聚而咻之兮功垂
成而不告歲忽忽其屢更兮意惘惘而莫宣時寐往而寤
來兮死茲溪之在前吾將探石髓於神山兮尋勝景於桃
源佇飛舄於王喬兮遡歸槎於張騫雲幢霧節不可以久
駐兮恍若送乎登仙荆溪主人聞而歌曰予之溪兮故鄉
予之莊兮此堂抱予甕兮水傍泝兮練兮中央進則用兮
退有藏參吾道乎相與翱翔招美人兮不來渺予懷兮天
一方予亦從而和曰荆之溪兮孰使爲清荆之山兮孰使
爲靈人與地而俱佳兮文與獻而俱徵彼信美而非吾土
兮悵無樓之可登感妙思於吳歌兮託騷辭於楚聲

義莊賦

杭濂

汎清溪之縈迴兮歷衆山之逶迤攬古城之秀異兮翼高亭其中峙鄉人指以予告曰是莊之義起也於大塊之爲生兮均一始而肇之日既逝而源遠兮聿岐路之攸昭恒仁人之斯憫兮獨意德之胥靡曰厚先之是尚兮茲故莊之所以爲義也繫柏翳之嘉祐兮振遐躅於南州赫瓊厓之美績兮偉子孫其承休維相君之茂碩兮天寔於是昌之由

先皇既隆寵兮極

今后而殊私羗百揆之脩能兮獨斯陟之克階

堅百神

聿其予歸兮五氣默以孚持膺命錫之既多兮獨燕滫予何心苟吾宗之或蹶兮顧先罰其何任繚垣構以百棟兮高腴麗乎千畝相厥方於城陽兮爰嘉勛以茲啓曰兒相其爾能兮獨吾竦于事事維印志于爾心兮歲檢悉乎攸利冬爾裘以饑黍兮女爾歸而男娶安其藏以爾阜兮明其業以爾誨爾墮吾之尤兮爾私吾之戾爰歲累之躡飢兮羗百口之偕安雖䟽幽之蹇澗兮亦容與乎清湍昔先君之斯服兮萃身終乎莫致惟小子之克成兮獨深承乎帝賚伊報稱之若爲兮期犬馬之殫瘁猶時曠以情渝兮懼弗長乎攸緒上告

帝以永矢兮惟

帝威之允賴

帝惟爾之攸忱兮胡重惜乎予昇於乎昔親親之有訓兮
曠百禩而胥違猗仲淹之盛美兮千載致邦人思伊相君
之媿隆兮遐不敬仰於同時予博觀乎茲世兮斯義之罔
攸知借蹇愔以稅駕兮惟豐利之交馳妻子獨飫棄乎甘
腴兮視粵秦其兄弟胡余身之爾殊兮獨不念乎宗禰操
觚瓢而溝壑兮遐不憖乎誰氏惟相君之阜仁兮允神人
之昭旁獨去此而紹徽兮聿彌遠而彌光亂曰家之祉兮
非或然乎天也仁之相兮獨不祈而然也羞爾存之孔厚

兮爰百祀而賢也

楚山賦

有序

李文

伊年孟春李子發自江門將探禹穴緬秦伯之遺墟登
延陵之故里濯纓震澤放舟荆溪竊高子隱之風尚締
蘇公之跡方皇周覽至于楚山其山蓋陽羨之奧區也
爰有賢良沈子別業其間因以自號李子迺請與之遊
自煙霞草樹之餘有方志山經所逸者於是作賦紀之
以風乎沈子之志雖其楮假罔銓然亦摛摭其事矣覽
者可以諒焉其辭曰

維荆南之有楚岫兮闔

音

吳越

以

函三奠其區之西表

兮余望之而求耽儵儵音倏蜿蜒其逶迤兮亦巉巖音宗而薛

莫音洩右掖君峯以下壓兮左映洞庭而上參揜芙蓉而

競脩姱兮引離墨以接天姥毓香蘭而發葱蒨兮嵐繞銅

官而泉通玉潭測玄圃呂準之星土兮寔孕靈于瀕女緬

微而掣音覽其朝儕兮將獻秀于斗南巨穹窿巨公音求歲

兮思黃虞之斧畫粵鴻濛之有此龐因兮羌何羨夫蠶

之音所談仰融春之聞會蔚兮奉音奉余踪之戾止思

巨窺窳窳音眇兮捫高雲之可探跨蒼虬之徐舒音舍

長松之偃蹇紛翠篠之娟媚音媚兮彼美箭之交加

而蚪蚪音糾兮愛毒藤之逸騰臨丹壑而絢爛兮

見靈藥之吐華噴龍頷之清冷兮望音蘆泉于峭壁蒸僊

鼎之藪音叢芝兮飛洞鄉于彩霞消余暘之灑音計洵音兮得

虎跑之舊次粲女指之柔莢兮采鳳團之早芽儵開藹音威

而染卉兮拾菁英于荏苒况躑躅而歧鳳兮詫礪音雷雷音畏

之紛挐恠鷺音犂黃楚雀之啄啄兮交翠柯而靚語羨磨音君

麋音語麝父之齧齧音簡兮狎清沐音流而啖夫錦葩維余愛此

谷口之歎歎音鮑兮悵子真之高蹈漸九磐而托丕構兮結

千仞之書巢葺皇墳之灑醞兮秘丘索呂充棟參處姬于

上下兮亂陰陽之兩爻飄凌雲之爽氣兮習子虛之美諷

捐下風之埃壙音滑兮笑玄文之解嘲瑣宿霧之溟濛兮抱

騷珠而歎炤埃曉日干曠曠兮齊鳳威之九苞葆汝貞于
珉璞兮芙蓉容暎輝之藉甚授余几而烏皮兮矧德音之孔
膠濯清風于斗筭兮忽明月之尊俎惠彼美之紉蘭兮感
余生之繫匏數青峯于江上兮履蕭艾之湫底耻闕觀于
夏歷兮慨浮雲之久迷登臨之未宴兮屬羲和之弭節
願方駕而連袂兮命奚仲而埽蹊歷翠微曰空容與兮攀
歷音履屐音儀之玄宇俯寥廓之四荒兮望瘡痍之遠黎獻陽
靈而承南離之炤兮調紫微之玉燭出崦嵫而霈西郊之
雨兮請策夫茲山之蹇覓羅孫登之清嘯兮盟嵇生之僻
癢謝七發之汗漫兮陟三俊之不釐余試解子之猿鶴兮

什北山之巖巖有媧皇五色之天柱兮盍捫參歷井而共
躋亂曰陟崔嵬之縹緲兮憇好脩之窅窕兮撥煙霞而食
潛壑兮余既已知握椒蘭與芬蒹兮薰緇袍之表兮聊與
子而盟兮白駒之不可終岐兮

荆溪外紀卷之十四

邑人楚山沈敕編輯
真州雲壁李文校正

碑附銘

司農劉夫人墓碑

許劭漢人

司農夫人祖自會稽山陰姓劉氏伊述夫人受持貞剛體

性純淑非禮不行闕一人仁闕二石闕五九族穆同

闕三子孫息盈房導男以闕七篤闕七母儀闕三容德配

古列任似為闕八宮闕十復全闕十酒甘香車騎陳闕七

公闕三奉闕十迎醫極俊迭素名闕九幽藏咨嗟酷闕十

命闕七畫圖像甄采典闕七鄉人闕五不忘

右司農劉夫人碑漢太尉許馹之妻也首行有標題之
文石已剝所存數十百字其漫漶者強半惟次行獨
全故其姓劉氏而為山陰之人其辭惟數句可讀如云
體性純淑非禮不行及孫息盈房而已其云德配古刻
任似者以似為妙也字畫多雜篆體所書以字全類孔
宙碑其他偏旁多與故民吳公碑中山相薛君題額相
類應劭漢官儀所載三公孝靈時有吳郡陽羨許馹季
軼漢紀光和四年馹以衛尉代劉寬為太尉今許氏兩
墓皆在宜興而此碑猶在夫人塚傍吳處厚青箱雜記

云義興有許馹廟其碑許碑所作唐開元中諸孫重刻
碑陰有八字云談馬礪畢王田數七今其殘碑纔有數
十字其間載許君自司農遷衛尉此文稱劉氏為司農
夫人則銘墓時許君未為衛尉也其碑在光和之間不
疑又云司農夫人碑題一行文八行行二十八字石尚
餘其半亦隱上若有字右具載洪景伯隸釋吳人盧熊
嘗得此刻云自伊述夫人以下合有四言二十五韻今
所存剛行同房容宮香藏鄉忘可攷

孫氏封禪国山碑中有闕字碑文

二民用不犯於是臣丞相沈曰闕六十字徘徊於此遂基

大官闕入 喪民子來不日闕入 頑器乃止率上來獻柔服

百神經緯庶務日異不食闕二 六經歲旨百家思闕一 道

數頻十陵道大啓朱光闔立東观闕二 紀實言建設墳典

闕三 聞實感神化出幽祗闡率乃遣使者大宥刑惡道尚

闕二 善格幽玄貺与五福惟神明上天因應闕三 箕宿降

祉利丰特發神夢靈壘鎮国玉璽啓自神匱神人指授金

冊有玉簡者四日月明明老人星見者式十有式五天瑞

氣黃旗紫蓋覆攤闕 官闕顯著牛斗者式十有九麟鳳龜

龍銜圖負書廿有九青蜺白兕丹角黑闕二 廿有二白兔

白麇力丁切 白鹿白鹿廿有二白雉白烏白鵲白鳩式十

有九赤烏赤雀廿有四白雀白燕廿有七神虎吐書白鯉

騰解者二靈絮神絮彌被原野者二嘉禾秀穎甘露凝液

六十有五殊翰連理六百八十有三明月火珠璧流離廿

有六大貝餘闕一 幹泉黍十有五大寶神璧水青鼓璧廿

有八玉兕玉羊玉螭闕一 三寶鼎神鐘神鑿夔祝神鬻廿

有六石室山石闔音開 石印封啓九州吉發顯天識韶石鏡

光者式十有式神闕一 頌歌廟靈闕一 示者三畿民推紀

湖澤閭通應識合誦者五神翁神僮靈母靈女告徵表祥

者廿有黍靈夢啓識神人授書著驗闕二 者十秘畧闕一

文玉板紀德者三玉人玉印文彩明發者八玉闕一 玉琯

玉璣玉玦玉鈎玉稱殊輝異色者世有三玉尊玉璽玉盤
玉壘清潔光曜者九則子河伯子胥王靈圖言天平墜地
成天子出東門鄂者四大賢司馬微虞翻推步圖緯甄匱
啓緘發若與運會者二其餘飛行之類植生之倫希古所
覲命世殊^同奇不在瑞命之篇者不可稱而數也於是旃
蒙協洽之歲月次^取訾之口日惟重光大淵獻行年所值
寔惟茲歲帝出虛震周易實著遂受上天玉璽文曰吳真
皇帝玉質青黃總理洞徹辨受祇悚夙夜惟寅^{寅寅}而大
德宜報大命宜欽乃^臣剛柔兆^兆滌灘之歲欽若上天月正
華元郊天祭地紀號天璽用彰明命於是丞相沈太尉

大司徒燮大司空翰執金吾脩城門校尉歆中騎校尉悌
尚書令忠尚書昏直晃昌國史瑩覈等亦^臣爲天道玄曠
^臣瑞表真令衆瑞畢至三^音表納貢幽荒百蠻浮海^{關一}
川九垓八埏罔不被澤率按典繇宜先行禪禮紀勒天命
遂於吳興國山之陰告祭刊石^臣對揚乾命廣報坤德副
慰天下喁喁之望中書東觀令史立信中郎將臣蘇建所
書刻王殷正何敕

晉故散騎常侍新平廣漢二郡太守尋除楚內史
御史中丞使持節大都督塗中京下諸軍事平
西將軍孝侯周府君之碑

陸機 晉人

君諱處字子隱義興陽羨人也氏胄曩興煥乎墳典華宗
往茂鬱其簡書啓三十之洪基源流定鼎運八百之遠祚
枝葉封桐軒蓋烈於漢庭蟬冕播於陽羨二南之價傳不
朽而紛敷大護之音聲無微而必顯山高海濶其在斯焉
祖寘少折節早亡吳初召諮議叅軍舉郡上計轉爲州辟
從事別駕步兵校尉光祿大夫廣平太守父魴少好學舉
孝廉吳寧國長奮威長史懷安錢唐縣侯丹陽西部屬國
都尉立節校尉拜裨將軍三郡都督大中大夫臨川豫章
鄱陽太守晉故散騎常侍新平廣漢二郡太守封關內侯

簪紱揚名臺閣標著風化之美奏課爲能亭亭孤美灼灼
橫劭徇高位於生前思垂名於身後遂以罕言不違應期
出輔洋洋之風俯冠來葉巍巍之盛仰繼前賢乃早孤不
弘禮制年未弱冠膂力絕於天下妙氣挺於人間騎獵無
儔時英式慕縱情寡合俗弊不欣鄉曲誣其害名改節播
其聲譽遂來吳事余厥弟謹然受誨向道朝聞方勵志而
淫詩書溲好學而尋子史文章綺合藻思羅開吳朝州縣
交辟太子洗馬東觀左承中書右丞五官郎中左右國史
靖恭夙夜恪居官次遷尚書僕射東觀令太常卿無難督
匡庶庶績朝廷謚寧使持節大都督塗中京下諸軍事封

章浦亭侯國猶多士君實得賢汪洋廷闕之傍昂藏寮案
之上射獸功猶見顯刺蛟名乃遠揚忠烈道自克脩義節
情還永布琳琅杞梓珪璧棟梁君著默語三十篇及風土
記并撰吳書於是吳平入晉王渾登建鄴宮醜酒既酣乃
謂君曰諸人亡國之餘得無戚乎君對曰漢末分崩三方
鼎立魏滅於前吳亡於後亡國之戚豈惟一人渾乃大慚
仕晉稍遷總統初入拜諮議郎除討虜護軍新平太守撫
和戎狄叛羗歸附雍士美之轉爲廣漢太守郡多滯訟有
經三十年不決者處以評其枉直一朝決遣以母年老罷
歸尋除楚內史未之官徵散騎常侍處曰古人辭大不辭

小乃先之楚而郡旣經喪亂新舊雜居風俗不一處敦以
教養又檢屍無主及白骨在野收而葬之然以就徵遠近
稱嘆及居近侍多所規諷遷御史中丞正繩直筆凡所糾
劾不避寵戚梁王彤違法處深文案之及氏人齊萬年反
朝臣惡處強直皆曰處矣之名將子也忠烈果毅庶僚振
肅英情天逸遠性霞翥恢北留棠遂有二天之詠荆南度
虎猶標十部之書尋轉散騎常侍輕車將軍迴輪出於新
平士女揮淚褰帷望於廣漢鷄犬靡喧振茲威畧宣其惠
和晉京遙仰部從迎欽是時氏賊作逆有衆七萬屯於梁
岷朝廷推賢以君才兼文武詔授建威將軍以五千兵奉

辭西討忠槩盡節不顧身命乃賦詩曰去去世事已策馬
觀西戎藜藿甘梁黍期之克令終言畢而戰自旦及暮斬
首萬級弦絕矢盡播采不救左右勸退處按劍怒曰此是
吾効節授命之日何以退爲我爲大臣以身徇國不亦可
乎韓信背水之軍未邊得喻工輸繁帶之勢早擬連蹤莫
不梯山架壑襁負來歸戎士扞其封疆農人展其耕織秋
風纔起追戰勇於雷霆春水方生揮插同於雲雨立功立
事名將名賢乎元康九年回茨增加奄捐館舍春秋六十
有二天子以大臣之葬師傅之禮親臨殯壤建武元年冬
十一月甲子追贈平西將軍封清流亭侯謚曰孝禮也賜

錢百萬葬地一頃京城地五十畝爲第又賜王家田五頃
詔曰處母年老加以逆旅遠人朕每愍念給其醫藥酒
米賜以終年以太興二年歲在己卯正月十日葬於義興
舊原南瞻荆岳崇峻極之巍我北睇蛟川濬清流之澄澈
娶同郡盛氏有四子靖玘札碩並皆志性純孝過禮喪親
墳前之樹染淚先枯庭際之禽聞悲乃下遂作銘曰

周南著美岐山表靈葉繁漢室枝茂晉庭皎皎夫子奇
特播名幼有異行世存風烈早馳聞望晚懷耿節頗尚
豪雄昇名禁闕捨爵策勲允歸明哲輝赫大晉封豕多
故式揚廟畧克清天步海濱旣折江淮並泝漢水作藩

條章斯布俗譟揆日人謠何暮忠貞作相追蹤絳侯將
亭嘉茂運掩方猷潛光陽旬返旆吳丘舊關維入鄉路
冥浮從榮制暮終非晝遊春墟以綠清淮自流深沉素
幘繚繞朱旒玄堂寂寂黃泉悠悠書方易折家揭難留
鐫茲幽石萬代千秋

唐元和六年歲次辛卯十一月十五日承奉郎守義興縣
令陳從諫重樹此碑

蔣氏大宗碑

蔣列唐人

昔者周公正天地之紀立君臣之度朝諸侯於明堂復實
命於元子於是旌以車服錫以山川雖名上公之位號實

周王者之禮樂然猶大錄豐功優命諸子宅魯侯於曲阜
城蔣國於期思父拜於前子拜於後得姓之始斯非盛歟
是以再見春秋永為藩輔受介圭而作瑞分寶玉而展親
備物典冊異姓為後南面而享國者十有餘世其後天子
微弱下堂而見諸侯大國憑陵容車以窺王室漢陽宗國
楚實侵併既食采於漆水又轉封於遼城爵土雖微親賢
不替自是寢以吞削又居於樂安漢徙賢豪以強京輔我
蔣氏遷於杜陵十葉扶踈皆為岳牧有若父臨上黨子守
弘農初並命於帝庭別增榮於王相欲加寵異分賜黃金
依漢室之仁恩成我祖之光顯兗州繼美高世而立拂衣

灞上不窺王莽之朝卧病長安猶載杜陵之水優閑三徑
荆棘塞門名先兩龔遊止二仲踪列于高士行書于孝子
豈云易哉有若步廣加冠應生美其禮乘輿奉轡鍾會重
其才賢能繼出文謀交映及乎漢室崩離三方鼎立俱有
德命並顯當時大司馬之匡蜀也材非百里運屬三分統
武侯之後事成劉主之霸業護軍之扞吳也舉忘私讎居
用儉節存錫御府之帳效賜蕪湖之田太尉之衡魏也軍
國大事文武兼資高論總於萬機嘉謀叶於三主迨夫充
州之後三葉至於大將軍浚道侯遭遇讒慝功業夭枉九
子浮於廣陵兩祖地於陽羨秦伯之克讓延陵之高節爾
其山川平遠氣象清和君山盤薄境其前瀟湖泓澄介其
裏雖聖賢之後宜有明德亦形勝之地必生通材不然何
其宗黨雍熙閨門郁穆世傳詞學家踐德義太丘父子羔
鴈成行平原弟兄文章連價自過江以還世數二十年且
六百或書當代之史或列先賢之傳禮樂名位紛綸歲蕤
不可遍舉也列聞之高必顛躋卑則淪圯霍陽韓魏旣其
剪滅欒郤胥原降爲皂隸而我蔣氏永中和之道守禮讓
之族根葉深茂源派靈長是以東西兩宗蕃衍千室皆聿
脩厥德無忝前人翰飛士林武接賢路夫一日復禮天下
歸仁况累代乎列之高祖陳長沙王國侍郎隋朝請大夫

府君所存者大所及則遠屬隋主遽幸維揚百司艱食公
獻米萬石用廩千官手詔優寵謙讓而退以全乎高也曾
祖建安府君進退觀時偃仰超世邴生自克陶令來歸何
清白於子孫樂琴棋於親友任道安命推財重賢名士聞
風自遠而至王父鄭州司兵府君孝通神明仁及草木脩
已而已立遺名而名高再踐王畿一行郡掾所許當年之
友無非高世之才則漢陽王張柬之御史大夫李傑蓋其
儉也天乎匪忱中世而歿困昌于延州刺史府君以積德
累仁以宏材碩量動爲時則言成世範餘風翔乎憲府故
爭命乎禮門國庠取法代仰司成天子題詩榮典郡國嘗

以張氏孝友侍宴周宣馬生詞賦陪遊漢武正言直道造
膝詭詞論已歸於謝公正焉避乎國子未伸王佐之畧竟
失蒼生之望小子何怙銜哀籲天徒敬奉於遺訓懼隕墜
於前烈將何以傳韋氏之經竟太初之史霜露之感歲月
其除假寐永嘆維憂用老乃考夫發源周宗爲本系稽之
中葉吳土爲舊鄉從吳則是存乎舊歸周則不忘乎本恭
惟先旨返祔于周自受氏以來無他錫姓旁列九土咸承
一宗雖前言往行布在方策至乎述祖德敘家風固子孫
之所奉不敢闕也嗚呼惟后稷允迪于前惟周公能開厥
後盛德之祀百世君子之家萬年宜乎邊疑頌徽猷累揚

德業乃相與崇建貞石揭立通衢俾舊迹光于千載之上
遺美施乎萬葉之後其銘曰

洪惟蔣國得姓之始我祖爰地期思是理文王之孫周
公之子茅土同拜山河濟美彤弓駢駢六轡耳耳本枝
百世輝映千祀施于漢乾岳牧貽慶非父入子連章並
命兗州隱迹拂衣謝病荆棘塞門蓬蒿閉徑迨夫三國
各振英聲太保光輔魏階已平司馬匡翼蜀郡惟清護
軍龕疑剪吳朝載寧追惟兗州慶延良嗣九子同徙二
宗本洎毘陵之鄉陽羨之地長湖高岳蘊靈毓氣聖賢
之後形勝旁通詩書代業禮讓家風軒冕居貴丘樊養
蒙紛綸江左籍甚寰中恭惟先德忠孝文懿惇惇小子
銜恤茹悴遺範未書斯文將墜晝則忘食夕則假寐合
宗聚族刻石方塘祖業光備家聲載揚仁賢繼及胤祚
靈長子子孫孫克傳無疆

山亭鄉侯碑

齊光義

左傳載凡蔣邢茅胙蔡周公之胤則蔣氏系業可知封土
期思爲漢東之國後以吞削楚實盡之而子孫散於郡縣
苗系守業重侯累相有若奕葉到弋陽之徙大族致杜陵
之遷則亦龜組聯徽熊幡並拜逮我高祖翊之臨兗州也
屬王莽秉政歸卧長安唯行三徑老而不起曾祖助會稽

太守祖晃司徒公或良二千石或敬敷五教並立名當代
垂裕後昆父橫大將軍浚道侯服大勛於王室遭遇讒慝
功業不遂所生九子悉從降徙公即大將軍之第九子也
諱澄字少明貽慶丕構降生靈哲懷忠國之志立全家之
績雖滅蹟江湖而克雪冤耻大將軍初遭禍薨也為司隸
羗路所譖延以非罪泣血枕戈誓將讎復時童謠君用讒
慝忠烈是殛鬼怨神怒妖氣充塞帝以覺悟竟覆羗路之
族焉諸子各於所居之處受封故以山亭鄉侯遂家於此
其必復也自憑於我裔其大門也不待於他宗洎三方鼎
分楚材晉用各為佐命位在訐謨所以降延代之休所以
垂不朽之稱由是體江山之便圖土物之宜有泰伯克讓
之風有延陵退耕之地其俗質其氣餘吾何以增之乃崇
墉築室於周山之陽將老於此馮巖阜之固無郭郭之勞
就土壤以為高因泉源而養正芝木未効形解告薨享年
七十有一與夫人司馬氏葬於封內之都山順也公所懷
罔極以逮形消所被讒人感於天罰孝者德之本又何加
焉用心惟微允報群藝立身之道適意為先故留名道學
傳存其事也故城舊廟猶遵餘祀嗣子丹陽太守休襲山
亭鄉侯可謂公孫之子有後於魯敬仲之裔復為正卿乎
我族之熾有如斯也及將軍元遜列於陳史尚書孝儼見

於實錄無遺德矣司農岑之盡力王室克著休勲遭彼敗
言遠從播黜雖清明昭洗而舊位不躋以誣盛德豈其若
是山亭竄跡之初也非求形勝取致鄱陽後以就封始有
茲所今之後嗣夾湖千室秀異於是乎出禮樂於是乎生
節義成風而衣冠繼武雖克脩代德乃謀孫之貽亦地產
惟靈天其與善矣裔孫監察御史晁即司農第三子所志
之心厝懷自遠痛夫艱難在目丘隴云平茫茫之跡永迷
承奉之地纍纍之墓莫辨薪芻之所故以聚宗黨飾餘蹤
刻珉石示來裔大雅云無念爾祖聿脩厥德不然則子孫
何以知之文曰

爰分我祖始自山亭瞻望代祀倏忽千齡山門夫記荒
隧沉銘裔孫涉難今來一經用建碑碣載飾松垵其庶
幾乎昭明之跡古而彌清令聞之響幽而重聆吁嗟兮
壟樹永兮青青

唐天寶十五載文部侍郎裔孫冽爲季父延州都督挺建
碑

宋紹聖三年裔孫之奇之翰率族人重刻

宋資政殿大學士贈太傅毘陵侯簡惠周公神道

碑

周必大 宋人

高宗皇帝匹馬渡江中興炎祚其豐功盛德固不容盡述

竊窺大要以仰成宰輔信用臺諫爲本三十六年間命相不一自今觀之激士氣復故疆張丞相浚之心也固根本候機會趙丞相鼎之志也奏持國乘一意和好者秦丞相檜也三相所主雖不同其人才進退政事弛張是非得失公論各不可揜至於身任安危則一而已當是時言路固在臺臣其視力輕重爲向背容或有之惟毘陵周簡惠公以乙卯歲趙張並相之日自四月入臺十月進殿中侍御史在職僅兩月言事至三十章大抵謂自治其國乃能成功今外有強敵內有群盜不可事虛文貽實禍歷條時政二十餘事指宰相不任責上變色曰趙鼎張浚肯任事須

假之權柰何欲以小事形迹之公徐奏陛下過疑尚望大臣盡忠今臣一及大臣便爲形迹使彼過而不改罪戾日深非所以保全之上改容曰此論甚可取其後連章極論趙子洎語侵趙公又論張公大舉北伐繫國存亡坐是不得其言而去迨秦公獨相意公憾趙再召公入及公入秦語曰宜鎮靜公曰葵固不言雖門下客亦不及也一日內降差除四人公言願陛下以仁祖爲法大臣以杜衍爲法又歷疏三大弊秦始怒甚不數月改左史因是流落于外十六年秦薨始爲禁從席未暖復去國孝宗即位與張濤辛次膺任古首被召初對有繩綱之論會上以張公

為樞密使督視江淮銳意恢復而公不以亟戰為然命
佐夏官明年六月符離退師乃超拜政府其時湯丞相思
退與張公並相或戰或和多取決於上而其賓客議論間
失之偏公始終守自治之說是則曰是非則曰非不將不
迎不諛不訐表裡洞達無一高遠偽妄又明年四月張公
罷十一月湯公亦罷上再起陳丞相康伯虜已約和國論
始定時公貳政一年有半矣因墜馬敗面傷手力請去上
不得已久乃從之其立朝本末如此所謂非苟知之亦允
蹈之者歟公諱葵字立義常州宜興縣人曾祖密贈太子
太保祖璟贈少保父裕朝奉郎致仕賜緋魚袋贈少師妣

王氏公少力學自癸核精京師兩學傳誦其文
宣和六年廷試以曆數為問公既詳對又為說曰聖人蕪
天地之職一物不遂必任其責凡易之人行內經之五運
六氣書之閏月定四時老氏一主二二主三三主萬物皆
當裁成輔相以實之然後可以和固天人之際考官嗟賞
提賓甲科調廣德軍司刑曹事靖康覃恩循改脩職郎用
舉主陞文林郎注徽州軍事推官車駕移蹕臨安親軍交
馳境上守死倅易公與判官攝行郡事隨機應變千里帖
然初大觀間諸郡增賦物帛其後赦書已蠲減而有使之
復取於民公白新守力止其說公去乃增如故薦章父上

改通直郎臨安府學教授起吏部侍郎陳與義密薦公遂
召試館職將試復引對上曰從官多說卿端人正士面除
監察御史紹興五年也尋充省試叅詳官開院適輪對論
內外兵勢上密以措事與公議信嚮方深既爲副端論不
合徙郡農少卿四求去皆不允兩召至都堂諭旨二相亦
云以言求去非朝廷美事公廢離言路半年自以親老家
貧請外爾乃除直秘閣知信州屢展戍期趙公張公當國
陳公與義執政改湖南提點刑獄公事以遠求易浙西又
避本貫易江東四歲四易地迄未當至八年冬和議已定
公復被召論爲國若有道戰則勝守則固和則久不然三
者在人不在我矣九年二月除太常少卿五月再爲殿中
御史論旣不合會傳某人賜出身除兩府者公又將論之
携䟽至殿幕改起居郎有詔侍從兩省薦西北人才公同
給事中劉一止薦呂廣問廣問叅政李光客也擬試館職
秦不可謁告不入言者論罷李併謂公受其風旨十二月
黜主管洪州玉隆觀十年郊恩復直秘閣十二年春起知
湖州十三年正月移平江府復以郊恩賜服緋魚北方初
脩聘勅使絡繹公不爲禮又積與轉運議論不協共劾公
設宴菲薄十四年二月落職主管台州崇道觀屏居鄉閭
二親益老家益貧荒歉連年乏不能堪公獨安之二十五

年十二月以舊職知紹興府二十六年正月過闕除權尚書禮部侍郎賜紫章服尋兼國子祭酒又兼權給事中言路忌之三月出知信州太學生列狀留公不報居數月復罷郡二十八年起知撫州引道疾作改提舉江州太平興國宮十月復直秘閣知太平州水壞圩岸公大加脩治凡百二十里傍郡諸圩皆沒惟當塗歲熟市河久湮雨暘交病公下令城中家出一夫官給之食併力浚導公私便之三十年八月進集英殿脩撰尋移婺州加敷文閣待制當江上用師調度繁興不擾而辦三十二年七月除兵部侍郎時孝宗初政命公兼權侍講積官左朝散大夫隆興元

年同知貢舉戶部闕官兼權侍郎上數批問錢穀出入公奏陛下勞心庶務日有咨詢若出人意表足以聳動觀聽今皆微文細故此必有小人乘間獻忠欲售其私不可不察蓋指龍大淵曾覲也上色為動自完顏亮繼立雖兩軍相持而移文議和不絕張公自督府來朝密為上言虜失泗州其偽官蒲察久安大周仁寄治虹縣懼罪皆欲來歸願遣軍渡淮赴之此恢復之機也相皆不與聞公請對謂不可輕舉累數千言上唯唯五月李顯忠將騎兵邵宏淵將步兵共十餘萬取虹縣下靈壁既克宿州二帥始不恟虜兵擊宏淵軍顯忠不肯援幸勝負相當至暮我師入城

明日虜亦解去金帛山積顯忠不以犒軍衆怒而潰散書
聞上思公言以左中大夫叅知政事正謝畢朝德壽宮門
無宿衛廷無閣門公乞輪差從之故事初拜相賜銀絹二
千匹兩執政半之辭則減半例自行首司申御取旨公命
勿申遂已每便朝二府先呈機速房事既畢宰相兼樞密
使自與其貳次呈兩府文書叅政稍退一日兩府擬元居
實浙西總管上連問如何相樞皆無語上顧公問可否公
前奏曰是人頃為御前買北貨乾沒萬計公論必不可上
乃却其除目後數日公留身上曰昨居實差遣不同議也
公曰此西府事臣不與也是時虜雖主和而右丞和兼都

元帥僕散忠義左副元帥統烈志窩握兵淮北專任邊防
以書達三省密院大畧謂方議遣使遽棄不備攻我符
離無乃為將臣所誤妄要功利乎今治兵決在農隙舊疆
歲幣如約則止衆謂彼不以興師歸過朝廷及督府反為
我設詞罪將臣其欲和可見矣上令答書差右宣教郎假
樞密計議官盧仲賢右宣義郎假將作監主簿李棡充通
書官棡以妹為虜主妃辭行命都轄官王抃代之十月末
仲賢等與虜帥議定為叔姪國上曰虜能以太上為兄朕
所深喜詔遣從臣為通問使而以右宣義郎胡昉假樞密
院編脩官脩武郎楊由義假樞密院管幹公事充國信所

亦議官臺諫交章言議和太速公與陳湯二公乞令侍從
臺諫集議衆益洶洶諸公待罪乞罷不許公獨留中固請
上曰卿何請之力也對曰臣誤蒙知遇欲爲陛下正綱紀
今不可得而正也上曰何爲不可公曰政出於一則綱紀
可正今朝廷督府左右前後之臣皆欲自行其言此臣欲
去者一也臣初爲言官晚忝侍從事有不可大即奏論小
則堂白言雖不從臣責塞矣固無愧於心也出而爲州事
苟難行反覆論之不從則委曲行之使百姓不至受弊亦
可無愧於心也惟預政以來每與宰相論事有以爲然可
而從者有不得已強從者有絕不肯從者十常四五暨至

榻前陛下又或不然大率十事勅書七八安得不愧於心
此臣欲去者二也上察公誠不以爲罪第不許其去議者
多請幸金陵公曰車駕一動能保後舉不爲浙東閩中之
行乎他日上又欲先下詔公曰陛下能行數事警動天下
乃可上問其以公曰臣自初對便乞迎還太上於大內盡
發內帑付有司勿令近習干政汰革溢額囚侍罷擊鞠節
飲燕內治舉然後可攘夷狄上稱善嘗因災異詔群臣直
言公請擇其可行者行之上曰類摺摭細故耳公又語及
前數事至議用兵不可輕有一擲賭乾坤之語上曰今戰
雖不足守則有餘公曰措置未善政事未脩雖守亦難同

列皆甚其言退謂公曰上不能堪明日公留身謝上更獎其直且曰聞卿在中書事力爭朕甚嘉之二年正月胡昉楊由義見虜帥於亳州通昉等拜仍求還四郡昉等不可械繫月餘上怒詔張公行視師屯復遣戶部侍郎錢端禮吏部侍郎王之望充兩淮宣諭使張公尋罷以湯左相都督軍馬太傅和義郡王楊存中為同都督改宣諭為參贊軍事會盱眙又報北界來有所議上方遣魏杞康濟充通問副使而忠義志寧二人遽引兵分犯濠滁志在邀盟於是臺諫詆宰執上和議誤國太學生亦上書乞斬大臣公與相參並乞罷黜上密以書示公曰初不及卿不止詔留

思退領都督於朝以參知政事王之望充督視公曰臨陣易將古人所忌柰何移都督於陛辭之日况存中已為都督之望乃見執政反言其不願正稱謂使之速往號召諸將併力扞虜上大以為然亦陞之望同都督明日之望又乞專委存中毋貳其權上復從之存中途都督軍馬而湯罷先是副樞洪邁罷上命公兼知密院事公以祖諱辭詔免繫私銜已而召用賀允中不兩月允中再致仕公兼領如故軍國事繁悉心裁決持論正平甚得上意湯相就貶道亡公乞歸葬上惻然曰何至是耶胡侍郎銓前與群臣俱貶公奏銓直言久謫嶺海今將任子壞之可乎上皆

嘉納嘗乞召用侍從臺諫上曰安得如卿直諫者公薦李
浩龔茂良上皆以爲佳士次第用之太常言郊牛薨公奏
春秋鼯鼠食牛角免郊况逸虞未靖請展郊以符天意事
下有司或引春秋傳晦日爲天忌乾德元年藝祖初郊以
冬至近晦自改用十六日甲子至道元年當郊而李繼遷
叛亦改次年今冬至適晦兩淮復用兵當候來年恭見上
帝詔從之時再遣武義大夫閣門宣贊舍人國信所幹辦
公事王抃使虜軍而擢錢端禮虞允文執政閏十一月新
相陳公亦視事公即奏臣向因頭墜求退聖諭廟堂無人
令力疾少留今康伯已相執政又有人可以去矣宣押數

陳相亦乞留公公請益堅乃除資政殿大學士提舉臨
安府洞霄宮陛對上曰卿筋力未衰他日宣召勿辭公奏
臣年六十七三二年不死亦合掛冠上爲悵然未幾王抃
使歸虜自滁州退師和議成矣乾道三年三月起知泉州
明年復請祠六年告老章五上大學士致仕閑適累年不
以世故縈心惟究極死生之說淳熙改元正月十二日薨
于里第享年七十有七上聞震悼贈正奉大夫後以子升
累贈太傅爵自宜興縣開國加毘陵郡開國侯食邑二
千一百戶食實封二百戶娶李氏同安郡夫人累贈魏國
夫人前卒葬縣東清泉鄉梅林之原明年正月己酉公合

葬焉四年太常考功議以正直無邪曰簡寬裕不苛曰惠
謚公為簡惠人以為允四男長縱從事郎點檢贍軍激賞
酒庫所主節文字季楷宣教郎知臨安府臨安縣丞皆早
世棟今為朝奉大夫新知辰州林朝散郎淮南路轉運司
幹辦公事賜緋魚袋女桂適朝散大夫知雷州鮑同孫男
十二人大年儒林郎監總領四川財賦軍馬錢糧所戶部
魚關大軍倉大辨承義郎新知和州含山縣事大壯通仕
郎次大本將仕郎次大中次大昌寄理從事新差監總領
淮西江東軍馬錢糧所市易抵當庫次大猷大直大仁大
翼大雅大經孫女十二人公孝於事親尤睦宗族當任子

先孤姪謝事編奏諸弟之子其薨也幼子與孫尚未命名
平生問學不泥傳註嘗論大學物格而后知至謂在人之
至為智在物之至為道以吾之智極物之道如兩物相抵
故謂之格夫物萬不同道一而已方其格物物我為二及
其物格則省視無我何有於物是謂知至作聖傳詩二十
篇行於世文集三十卷奏議五卷晚號惟心居士昔壬辰
歲公年七十有五予自小宗伯奉祠歸過陽羨別公里第
臨分執手眷眷若有所屬後二年而公薨棟等推原先志
以著作佐郎李遠所述行狀屢求請銘其猶子檜用公奏
入官今祿廬陵日道二子之意趣予如約義不可辭銘曰

惟幾惟康古倚良弼耳目股肱衛上則一身任安危端
諒篤實和戰何常隨事應敵其在我者知竭心力降及
後世其職乃析越在臺諫箴規排擊始終所守自治吾
國時雖不同論則無易或從或違不爲形迹進居廊廟
將順輔翼前之責人今以自責不訐不諛有始有卒皇
心褒嘉士論厭塞躬或下下底績惟簡惠公允蹈
無失我作銘詩追紀賢德言蔽之主聖臣直

重脩晉御史中丞道

英義武惠正應王周將軍

祠宇碑

有歌

曹復亨

元人

盛時交鬼神有道故仕

必求精誠不二之人先事

而後禱自有以感于無自實以通于虛以氣合氣交於神
明盡敬而不祈福爲斯民立命立心也春宮掌六祝之辭
孟春脩群祀仲夏雲祀以祭功祭典曰以死勤事則祀之
能捍大患則祀之漢承周故祀公卿有益於民者故蜀郡
脩文翁祠密縣留卓茂廟唐禘享功臣於廟庭仍命狄仁
傑持節使吳楚狄去滫祀留夏禹泰伯季札伍員四廟而
不及孝侯豈吏民未立祠宇而部使亦獻闕歟抑仕吳仕
晉爲國亡臣故畧之歟南唐議禮徐鉉奉詔爲祠官集郡
縣長吏行祀事即其像而爲之頌石刻今存于祠千載公
是得無評焉昔魏武孫堅世臣炎漢魏伐蜀策據吳越稱

王權即帝位坐視危亡兵不襲許吳魏同罪首也司馬一
統歸晉者無疵將軍諱處字子隱除害討賊立朝大節載
之信史茲不多及也宋累封武惠正應王至元丁丑有司
上贈恤之典廷議特允其請命數有加錫封英義夫春秋
薦享常儀郡國肅其壇宇誠之曰毋不敬敬則誠誠無邪
又曰嚴局鏞毋夾濟介爾福將軍廟也于此猶曾人祭素
山也殿宇頽落而廂廊散蠹前代豐碑多卧于地下過者
拜而禮之來者必有所祈貴富賤貧好善稔惡禱於神者
尤煩或喜迎神以誇侈靡或凍餒人切稱儉裝嚴而取悅
於觀者經營脩飾不聞先施是人也徐士滿夙積厥德享吾

道仙佛惠濟之說延名士買書教子孫考祀典以事神至
正辛卯秋七月集鄉三老言於州長馬合謀盧僧孺暨同
知張完者曰祭者報而無祈周將軍捍災禦患法施于民
功業在吾邑人舊祠寔廢將大建規模惟長者相民之父
母懷之衆諾不吝然施者已竭而執藝者未就士蒲乃求
假於鄉里鳩工度材計費千錠群傭給廩餼者三百人廣
尋拓地四築垣墉廟既更新作廊廡四十八楹磬折殿宇
而迴拱端門再建二祠抱翼寢室右奉王之父母左列王
之諸子別立齋室十楹求方士奉祀守贈文雲棟虹梁金
碧照映千里外內來祝妥靈凡梓人飾材汗人作堵規矩

繩墨之責動輒數歲何旬月之間而落成薦饗惟誠格神
惟德服人鑿山堙谷成之非難而况祠宇繼復之力惟其
吝於事人鬼神之敬亦簡復亨謫居是邑過濟危之橋行
甃砌之路里人指其地而告之曰斯則徐德士私帑之所
理也三皇素府君廟徹而新之邑人仰其人而祝曰此非
徐德士之潤色者也予與德士同里聞知其人不淫債不
連田常語同志毋積財益過三分損一為傳重計餘悉敬
神貴有德量入量出不利益一已告神相人神悅人感邦
人頌之咸思刻石舊達魯花赤也先政教裡祀化洽一方
解篆而不忘其敬是年冬十二月率曹璋十四人奉書來
請記噫載新實備徐之力也風雨時若俾吾邑邑安居此
邦者神之賜也惟神若天罔有不慶乃再拜而為之記又
從而歌之

功在民者銘鼎彝張樂迎兮展敬儀神之來兮奚所為
保時序兮民受釐荆山肅兮溪水清希來止兮如事生
酌秋露兮拜王庭留湏臾兮吳粢盛民之祝兮卜疑謀
闕宇新兮調庶羞神下勞兮燭其幽皇乎為兮於此留
豆籩徹兮八音陳民永懷兮鏡翠珉神整馭兮游清旻
保皇祚兮萬斯春

善權寺碑

徐有貞 國朝

舉宜興山水之佳處無善權者其寺始建於南齊至唐中
廢而李蟪興之及宋李曾伯乃益拓而大焉事具舊碑方
予在朝時嘗擬一遊久矣及遷謫後蒙 恩召還自金滄
也乃始得之吳距陽羨水行踰三百里自陽羨山行又踰
五十里乃至登而望焉南條之山越萬里來自坤趨艮界
江及海如斷合從而爲連衡水有分流山無絕脉又如百
萬之師橫列大陣中抽一支爲游兵旁出擇利分合營駐
於數百里間後倚連城前環鉅浸外固中闕蓋天然一奧
區也有三龍洞九斗壇靈竒之跡甲彼諸方而主持之人
寔難其選寺之規構初極壯觀歲久寢敝殿堂門廡無一

完者而鍾樓殆將壓焉予喜其地之勝而憫其寺之敝旣
爲訢然以詠又爲慨然以歎時住山航濟川方出未歸其
徒迎予止宿上方及旦留詩以還還及陽羨而濟川追見
予蔣氏之墅一談契合遂聯舟行至惠山而別別時濟川
曰航之承乏而主是山有願力焉公幸爲我成之予問其
所以曰航將興而脩之自鍾樓始其祝釐之殿及藏殿法
堂笏室禪祖伽藍之祠兩廡三門將以次第圖成公能不
我鄙遺文以記之我願畢矣予意其未能遽成也姑應之
曰待爾事成予當執筆至是濟川來曰我事成矣公其無
食前言予使嘗從之遊者試往觀焉則果成矣其人駭以

以報曰今之善權非昔之善權也莊嚴法界山水增輝
當晝見之若堯率之宮及夜見之若廣寒之府使人影影
焉泠泠焉有出世間意予聞而慨曰是何果且敏哉有志
者事竟成古人有是言也然立志非難而成事爲難吾見
世之君子其學也未嘗不以用世立功業爲志及其用之
立之卒如志者幾何人哉其不遇者亦有辭矣或遇且操
勢據權以天下之資爲天下之事不能成之而反敗之者
將何說以自解昔蘇長公託薦誠院僧應言事而謂士於
論事易作事難作事易成事難其豈揚彼而抑此耶蓋實
有所見而爲然耳今吾於濟川亦云

重正衛將軍廟碑

杭濟

惟我義興有唐鉅臣曰衛將軍逖少習劍武長游并汾學
明義道高祖起晉陽將軍仗策從之出入陣伍前突後擊
擒竇建德有功太宗拜將軍宿衛既而上疏乞歸養卒以
孝敬睦閭門忠信居鄉里邑人懷其賢立廟祀之唐史失
其傳惟許渾有詩及序頗記其事廟在縣治東二十五步
舊有王教誌碑歲久滅亡今郡縣國誌具載之

國朝洪武武臣附祀非鬼廟僧利其善幻惑人遂徙將軍
顯其祀弘治戊申邑人知州胡璉白憲司得牒命復之厥
後屢遷屢復庚申僧遂滅像廟額務崇其非祀適今大令

晉江王君鍬始政邑之士人奔走祇告令乃感然起諭于衆曰惟僧畔神若是詎可以守祠乃命盡斥其黨特命道士劉克誠主祠事黜滅淫鬼反正廟名像塑額顏煥然具整殿廡庭垣悉戒潔除毗士賀仲鄴道填溢令可謂祇力於神也至矣惟士令賢克世而表厥後時必俟其人若將軍名實殆隱矣卒得顯拔大令祇助邦士遺廟百年蹶而後振固大善足以鼓動百世詎匪人彝好德始終不磨抑亦天意右善自不薄耶故吾於神重有感焉且幸也訖事今來請予記石予惟隱善弗暴實之勝也見善必章德之尚也而章善必忠義之極也以是遑將軍之晦美賢大令之善善而樂孝忠之弗冥遂記其事爲後者視尚冀有起百世與閑其義云復繫之詩曰

烈烈將軍相厥歸唐殪彼大憝介馬金鎗帝曰汝功弁錫斯皇曰有介馬孝不終克乃丐臣躬乃畢子德亦有敬信教家田里有大將軍孰曰戎止矯矯令膚曷世匪童有皇渾詩是曰不亡亦祇有廟祀于故鄉何千萬年洎此匪滅惟侯是競乃躡斯植有廟堂堂有廟奕奕匪公則慶此邦是寅惟賢有毗惟德有親惟是孝忠孰處以聖匪人斯爲助天有覲或示來禩勒文此石尚冀攸同相是罔極

宜興無極導禪師塔銘

危素 宋人

宜興中隱院沙門祖訓年且九十以其師導禪師塔銘爲
請稽諸事狀瞿然而驚曰孝子其何可以不銘禪師宋宗
也系出某諱某母計氏素慕佛乘咸淳四年十月將誕夢
白光盈室者三夕師之生未嘗啼哭北兵至母携之匿苦
中遊兵徧索之俘母去父從求之不得且死某氏憐其孤
兒育于家稍長常語人曰誰無父母吾父死將柰何母之
俘當北行吾願畢此生以求見不然何以生於天地間嗚
泣誓於觀音大士且暮必二千拜期以見父母比藝事苟
可歎曲語近人人者雖至汗賤甘爲之或又隱於刀鐻以

遂其志走十寒暑至河間之樂壽縣有老翁指其處蓋貴
宦家既見母久不能辨師乃稱已乳名與内外族媼抱持
慟哭觀者咨嗟涕泣他日請母南還母曰吾不幸至此朝
夕禱上帝乞歸此非不富貴從汝歸死足矣然居此又人
素敬我當徐圖之踰年終言于官而後奉母以行因請曰
母子相離一十有三年幸而見母皆佛菩薩力乃製竹輿
坐母其上負戴以行十步則輟爲五禮拜至補陀落伽山
而返仍雜髮報其親從鐵山瑯公於廣德東山得度禹步
浴印玄要深坐崖菴晝則以管夜則霜露凝寒虎迹交前
皆弗顧及菴于道場山侍母進食益奮烈堅忍脇不傳席

過杭之淨慈值無有元公與師語器之後泛舟中聞漁歌脫然有省遽還謁元公隔窓聲曰這裏無你處師拂衣去尋築慈照菴於弁山之陽母以念佛三昧終既葬一夕空中有白衣人語曰緣在宜興乃得玉峯於宜興萬山之中建寂照禪院間過郭門東北顧祖訓云斯為吉壤况當通道遊方者有所歸宿即走作中隱院有妙雲祥公首捐小屋與基州將脫因君力贊之拓其地義士將贊徐士蒲等爭致財粟院成師亦多來居之浮圖師為大司徒號曰定惠正覺明悟禪師至順三年正月六日召大眾垂示法要跌坐而化闍維舍利無筭分塔于寂照中隱世壽

六十五僧臘三十大德間璠公道行三韓元公其同門元公嗣無門和尚師固有承傳及師之沒祖訓未嘗少忘以至本清善良善新善伏等莫不協恭上下雍睦無間遇之不問可知為師之門人兵革之變骨肉離散世以為常若師之堅著以求其母乃數數然况望其真參實證悟徹大乘耶然則師不獨以孝稱之美乃為之銘銘曰

建炎渡江乘六龍維城布義多其宗吳興近輔支幹隆
熊羆奄至迅如風孤兒父母遺書中父死母俘兒莫從
天長地遠河山重呱呱夜哭天家家飯依人士極嚴恭
隱身刀鐔冀毋逢十年瀛州觀音容迎歸若雲歡聲同

一朝剪髮辭樊籠
禪林扣擊師瑤公
教令漁歌萬念空
前後際斷無初終
西遊荆溪隱玉峯
寂而能照真圓通
巖巖兩塔樹柏松
史氏著銘示無窮

善權洞銘

有序

徐問 國朝

戊子夏四月毘陵養齋徐某與荆溪靜菴周某童人善
權洞篝火揚光縱觀諸詭瑋陰幽宵然若非人世心獨
異焉出而銘諸石壁其辭曰

惟山有洞肇于鴻濛
新參鬼斧人為匪工
怒視攫石驚濤
沸空中起玉柱支幽
倚崇高居靈囿下藏
蛟宮惟天壤物
盈虛弗窮闢呈象圖
書所宗非我飾異斯
理之同

